

本朝分省人物考

人物考卷之八十九目錄

河南彰德府

郭資

石璞

蘭從善

翟政

周晟

劉潺

李和

李顯

徐憲

樊凱

崔陞

李鏖

賈錠

崔銑

張士隆

馬卿

張衍瑞

王勳

葛覃

郭樸

李秦

王邦直

河南衛輝府

邢冕

靳義

郭欽

馬英

周鳳

王嵩

李文泰

原潔

劉璋

陳曄

陳玉

馬龍

李光幹

潘鐸

李可登

劉珏

蔡揚金

陰秉暘

河南懷慶府

郎敏

蓋霖

劉幹

王黻

王懋

何瑋

劉涇

本朝分省人物考卷之八十九

河南彰德府

郭資

郭資字存性彰德府武安縣人自幼志氣超羣弱冠入邑庠從師受春秋有所造就洪武辛酉入太學甲子領應天府鄉薦明年乙丑進士初爲戶科庶吉士改戶部主事丁外艱服闋實授本部湖廣司主事吏不容奸聲譽頓起陞都察院左僉都御史無何尚書郁新以才薦之授前北平布政司右叅議蒞事之初卽以本司弊政爲言太祖嘉其忠直陞本司右布

政資悉心殫慮贊佐有方不數月陞左布政使精勤  
詳慎紀綱大振豪猾歛跡良善獲安時 成祖在藩  
邸尤愛重之資有所言無不聽納及起義靖難命資  
城守撫輯兵民供給糧餉百費所需未嘗乏誤嘗以  
漢蕭何擬之 成祖卽位論功召陞戶部尚書 賜  
白金文綺楮幣視諸伯未閱月以北平重地命掌布  
政司事未幾 詔建北平設行部拜資行部尚書資  
以北地軍民初安生業始遂而官司所費冗濫當樽  
節以恤下乃惓惓以祛弊舉廢爲務或有不悅而謗  
資者 成祖聞之降勅慰諭益以心膂任之滿考賜

宴內廷頒勅獎諭歲辛丑定都北京革行部調資戶部職務叢脞資勤以率下百事修舉仁宗嗣位加太子太師蹇義夏原吉數短於上謂資偏執妨事且病令致仕上意不然間以語大學士楊士奇曰先皇興義旅一切軍需糧餉皆出資調度及吾昔居守甚得資力其人亦才且誠今必如二臣請是吾危則任人安卽棄之吾誠不忍士奇對曰故舊無大故不棄此皇上盛德顧資疆教人不得干以私但詔勅所蠲租稅資必責有司依歲額徵此過之大者誠如二臣言然耿介守廉非衆所及上曰吾在此

復有原吉與同事彼雖偏執莫能行也已竟罷政甫  
賜璽書歸武安資歸 上念之不已間謂士奇等曰  
無使大臣怨乎不以資其謂我何 命戶部給半俸  
復其家 宣皇嗣位詔起資爲戶部尚書免朝謁次  
視事勤雖大風雨不避僚吏敬懼滿考 賜宴於禮  
部獎以勅書簪資如歲寒松柏愈老愈勁其優待較  
厚若此宣德癸丑十二月疾劇屢言蒙被 朝廷委  
任無以効報爲愧切切訓諸子及孫當感恩思報  
及家事以卒年七十三 上深悼惜爲資罷朝遣禮  
部尚書胡濙賜祭勅工部製棺營葬贈進光祿大夫



杜國湯陰伯謚忠襄官其子佑爲戶部廣東清吏司  
主事卒之日家無餘貲公卿大夫皆往哭弔致奠祭  
自始仕至老家視國事凡所施爲毅然自任不畏強  
禦怨有弗避害有弗辭與人辯論嚴厲之氣見於辭  
色而推之於政略無害人蠹物之心所居在馬莊村  
頽垣樸舍未嘗治第府城故人稱其有守云

石璞

石璞字仲玉臨漳人永樂庚子鄉貢入太學初爲監  
察御史宣德中遷江西按察副使按察使山西布政  
使璞剛介有治才所在著稱在江西時民娶婦三日

矣壻婦往拜其家壻先歸婦後失之徧索不獲婦翁  
訟壻殺女壻不勝榜掠自誣服云棄尸前塘中官使  
人求之果得尸獄成獨璞疑曰殺其人而棄尸非深  
怨者不如是也彼初婚方燕好胡乃爾爾乃齋沐夜  
焚香祝曰此獄關綱常萬一其婦與人私其夫既受  
汚名又枉死於理安邪夜夢人贈一麥字璞思曰兩  
人夾一人也獄有歸矣比明械囚首令待時行刑囚  
未出璞見一童子竊向門內窺璞令人召入曰爾羽  
客胡爲至此得非爾師令爾偵某囚事乎童子大驚  
吐實果二道士素與婦通見匿之樵麥中江西人號

曰斷鬼石在山西時議修堯廟一夕大風拔木積廟前皆棟梁材後進工部尚書正統戊辰河決滎陽經漕濮至陽穀入漕河潰沙灣東隄入于海命璞治之河決口塞明年己巳處州盜起命璞討平之景泰辛未也先寇獨石命璞兼大理寺卿往璞充餉勒兵修垣守險 康定帝賜璽書曰爾忠勤善謀素爲邊人信故爾事平進太子太保改兵部尚書丙子湖廣苗叛奸民李珍魏玄冲往爲向道引之寇掠作讖文于湖湘訛言日騰民用大擾又命璞往璞以計生得珍玄冲檻送京師苗平還治部事數年致仕天順庚辰

英皇召大學士李賢謂曰石璞純臣也聞其尚健然貧爲我以璽書召來至京師 上召見文華殿璞

服素袍繫角帶入 上曰吾賜爾緋玉敝乎璞叩頭

曰臣平生以孤忠奮無結納今臣自分填溝壑矣

詔至臣自知亡他途必臣有罪當誅遣耳 上說是

時璞微賸乃命掌南京都察院事成化初致仕歸五

年卒初璞在山西時其夫人與諸僚妻燕歸慍曰彼

多金珠綺采吾布裙襖甚不稱布政妻也璞曰爾何

坐曰席首日使吾墨于憲汝安得居此座且吾素不

以妻子故宦彼金珠綺采者後欲居汝席得乎明年

其夫果有以墨罷者自大司馬歸彰德買田百餘畝  
貧不能治第爲別業于高平渠南但傍岸作屋三楹  
卑甚且闔屋左茅舍垣內僅一畝有安陽人自典史  
歸璞往其家盛治具几上陳銀器前列金杯十餘璞  
見之問曰爾宦幾年曰未一考也曰胡歸乎曰刁民  
誣吾貪奪職曰使吾治爾爾焉能還鄉里哉拂衣出  
其廉介性成若此

蘭從善

蘭從善字從善磁州人山東陵縣教諭遷揚州府學  
教授 宣皇爲皇太孫志慕堯舜 文皇擇天下名

儒輔之中選者毋得拘階序從善召授翰林編修與  
王值錢習禮十五人日侍講讀從善行端貌重所論  
上皆帝王之道閱十年從善遷贊善 宣皇爲皇太  
子從善自侍讀遷洗馬 宣皇嗣位同事者皆遷顯  
要甚者卽拜尚書而從善獨與王值留滯不調遷者  
得志逞氣勢焰赫赫從善日坐東閣中細書暇則取  
秘書讀遇休沐與抑菴公載酒郊遊覽勝賦詩意泊  
如也又數年以久次遷學士 上方嚮學從善以舊  
臣見信用每進講多鄉音 上日久宦不改其素從  
善其君子哉年七十援例求謝專上慰留之又四年

乃得請還郡而卒

翟政

翟政字以德安陽人少穎悟越人同舍生傳萬學士詩義數百篇甚珍愛每夜俟諸生寢始出而誦之政立戶外竊聽盡憶景泰甲戌舉進士授大理評事晉山西僉事李都御史者嘗坐事 詔廷臣案之廷臣下政勘政以實報都御史幾失秩吏部汰省府官都御史署政考下下曰雖任風憲不能激揚遂罷政政不能平曰上官過固當覆如欺君何古以忠賞今罰吾忠吾君安得聞遂 奏辯 詔令致仕政歸貧甚

守志不干謁日坐庭中誦書學詩取古帖臨寫政質  
直言不依阿行無藻飾居鄉幾四十年而卒

周 晟

周晟字德明安陽人也始生之夕其祖夢一儒生趨  
而揖之祖曰是孫他日必以儒興吾家既能言卽穎  
敏如成人爲文章卽有理趣歸補郡庠生甫一歲卽  
領河南鄉薦時年十九也甲戌登進士第拜廣西清  
吏司主事又三年奉 璽書審南畿重囚天順中推  
承平知府在任七年陞湖廣右叅政歲辛卯丁父憂  
服闋改叅山東政乙未就陞按察使於山東丁酉晉



江西左布政使觀政刑部時大司寇尚嚴毅屬官少  
當其意者獨晟所分因引審未嘗有所反異其所爲  
獄辭往往得事情合律意用是大爲稱重具疏留爲  
本部主事前後有所平反全活者甚衆然未嘗出法  
外以邀譽出守永平政尚寬大尤留心民事聞屬邑  
有不種二麥者親爲勸課之民始得享其利民間子  
女有貧過時而不婚娶者諭富戶出財帛資之一時  
婚配殆盡晟出自刑曹於治獄尤其所長郡中積年  
寃滯一一爲之伸理民有水清鏡平之謠及叅湖藩  
所至刺舉惟當凡利民事不擇劇易視其力所及而

爲之改山東其所施爲略如在湖藩時既長憲臺發  
摘奸伏幾無所容然嚴而不苛論者以爲得憲體其  
施爲大略有如此者事母極孝待諸弟更友愛人以  
爲天性夙稟抑復得之家學云

劉潺

劉潺字宗瀾安陽人天順丁丑舉進士授刑部主事  
四時着布袍出止乘驢湖廣都御史翁世資與都指  
揮訟 詔潺往會御史焦顯治顯欲歸獄于指揮潺  
曰如公言何名爲法卒坐世資遷郎中京師有兄弟  
爭襲者各重賂累年不決至是賂潺潺持金白于司

寇乃竟其事晉浙江叅議進士盧某暴其鄉潺察問  
除名再改陝西鄜民寇氏關中大猾也部民寇扁頭  
與其祖適戍者寇扁都名相近遂竄軍籍潺閱籍疑  
之卒驗實軍歸寇氏遷叅政再遷四川布政使却宣  
慰楊氏金召爲順天府尹道出褒城流民入蜀就食  
守關吏不許潺令弛禁遷都御史巡撫遼東弘治初  
致仕歸自課童僕耕時兩子舉于鄉日校授諸孫所  
誦書春秋祭墓必泣諄切質直無華言雖幼賤與均  
禮弘治乙丑疾革遺命母于恩澤作墳擾鄉里卒年

七十有八

李和

李和字本中安陽人天順丁丑進士授吏科給事中嘗論事件旨廷杖幾死遷都給事中通政司叅議右通政每居一官積年不徙成化末李孜省以左道進而大臣競樹黨中官梁方等用事最後萬喜有寵士夫躁進者與相結納朝合夕遷和獨以靜正淹滯有齊姓者閔和久次謂曰公常恬如將俟河清邪今諸貴人亦素敬愛公特二帕贄造請食頃耳而卿佐可得時乎可隨而不可與之亢也和謝曰吾譬之屨黑髮守節皓首乃求聘乎退謂所親曰吾見附人者有

害亡利是時有郎中素結倡優進欲爲通政乃傳旨  
遷和爲南京戶部右侍郎以彼代和至戶部六閱月  
而卒和豐貌恢量雖倉卒言色罔躁喜愠莫顯然內  
含獨朗於事低昂及人賢不肖不失分寸父光道得  
痿疾彌年和自奉養躬上溺器久益虔儉薄不計生  
產子華少好俠稍侈和每責之曰由奢入儉難爾少  
耽安閒老必辛苦論者稱其不競不激含光蓄景如  
澄潭無波珠玉自瑩時以爲確論云

李顯

李顯字道彰安陽人成化丙戌進士授翰林院檢討

事 吉王後拜長史再改楚府弘治辛亥卒年五十  
一顯介特有志不輕下人凡舉進士者卽圖陟顯要  
富貴可致而顯終身留藩邸當選授時多稱病避或  
託貴勢請免顯曰士筮仕卽擇便利邪必如公等顧  
令王孤立乎往就選在楚府放逐豪猾官田稅改令  
謹厚者掌奸人訟指揮于某受賕顯直其罔某夜持  
金謝顯叱却之顯居鄉時歲太凶日以糜藥給饑暨  
病者在楚歲又凶出俸金寄親戚少與張文友文死  
顯塋之事其兄如父時人稱焉

徐憲

徐憲字振綱安陽人成化戊戌進士授松江府推官  
松江天下稱饒而民頗狡憲以約已推誠爲治民稱  
之曰徐青天有盜牛者以火刀更其角莫辯也憲令  
縱牛入野牛奔王家闌中乃治盜罪入內臺爲御史  
出按甘肅番貢獅子憲令守關者勿納上疏言獅子  
異物受之則夷生玩心況日食牛羊百夫枉之昔武  
王受獒召公戒曰細行能累大德往者夷貢獅子受  
之故敢再貢彼蓋窺我好尚矣却之便時例贖徒者  
并贖杖憲上奏流之罪三贖米四十石而止雜犯死  
罪不踰五十石今增贖杖法則三年者米至四十五

石矣是雖輕於死而實重於流也憲以親老謝病歸  
天池卒年五十一

樊凱

樊凱字大振安陽人少給役至縣令見其狀貌驚令  
學凱長身玉立美須髯成化初選尚 廣德公主凱  
與周景同鄉凱慕景爲人襲其行事景傾心與友凱  
亦能爲詩成化丙午命統禁兵日介胄升殿侍衛正  
德初劉瑾用事自公卿以下莫不折節而凱獨不屈  
嘗曰凱幸託主爲朝廷肺腑戚縱自輕柰辱主何所  
統卒王某者瑾鄉人也有心疾凱數掠治某知瑾惡



凱正值瑾出東華門將升肩輿某稱寃狀列凱受禁  
卒金且多私役者遂罷凱侍衛凱善論事有康濟心  
河間諸郡民貧苦於繁役生子越兩人卽闔之每歲  
終禮部納用數千人不與者猶數千入部中譁自尚  
書以下反避匿凱曰此已無家故志意蘊憤誠得發  
遣使事藩王嚴禁後勿得闖不二年此患遂息論團  
營軍曰軍太半私役矣不卽受錢代人役或負擔以  
生逮操弱弓敗矢取具臨時食頃罷一旦有緩急非  
但不可賴亦不能集宜於都城東曠郊指揮以下將  
兵官各立保伍毋得他出給兵符爲信且守且練有

事命將往統之斯強榦而制枝矣子琦瑤俱錦衣指揮同知

崔陞

崔陞字廷進號南郭學者稱南郭先生其先樂安人也後籍安陽童時會父失官貧甚日一食然猶糲也而於書顧益攻成化乙酉舉于鄉己丑登進士拜都水主事改武選以父憂起改主客又以母憂起武選擢職方員外郎出知延安府陟叅政敷歷中外凡三十餘年陞既以蓬華力致青雲巨才洪識遠越倫輩而水蘖奮勵無殊寒約遂能輝前裕後慶流于子孫

至今相人訓學誨德必曰不見南郭公少時貧邪今人凡少貧至貴顯必婪而陞主客時番人有踰額以請者業賂鈞樞者許之矣日趣上議而執弗僉名番人夜持玳瑁奇香各十餘斤餽斥之出且聲其事遂寢雖歷三部階五品然僦屋而居兢兢如少時出則一瘦馬青布袍耳僮日出拾馬通淑人李雜儲薪手爨之先是星變求言與餘干蘇章同奏暨闔于政妖僧蠱惑援芑愴壬竄逐忠良所致又言兵部尚書王恕今之伊傅不宜置之南京奏入不報而他言者或頗及宮禁秘密上爲之怒於是書言者六十人姓

名干屏擬升則絀其級不則遠惡地於是吏部故遲之 孝宗卽位乃有延安之命邊郡瘠耗習猾而俗夷至則立規畫固扃鏞謹簿書節浮浪省遊宴公暇則親植菜私園乃清疆場覈徵稅平徭役鋤豪橫招流逸墾荒田實廩庾葺廢墜療疾疫敦行布惠黜邪崇禮興學誨徒咸鑿鑿名實先是成化末郡大饑民大半亡漢中山谷中陞蒞郡復者十六七會屢豐斗米數錢耳嘗見宜川知縣唐來馬鞍驚曰鞍如是華邪廉其價近百金曰有一鞍百金者邪遂收按之果盡獲其貪狀又杜文祥者延之巨猾每大言曰崔誠

好然貧官也聞其自少貧吾起大獄必使之不寤意  
聞之必通其關節而佯若不知者已而以殺人專致  
于理鞠之罪不至死遂生之議者謂其內明而外容  
剖大決難靡動聲色而不知履堅秉貞識體負器自  
郎署時定矣在郡七年擢四川右叅政弘治丙辰監  
營壽王宮於保寧役者數萬人費覈而力舒戊午逆  
申王于境民無擾者人稱之行部勾稽既詳顧又喜  
廉臧否與僉事曲銳齊名蜀人語曰崔叅曲僉屹如  
雪山嘗如松茂得暈疾久弗愈己未秋遂致仕歸歸  
三十年卒陞恭儉出于天性少壯隱顯一致故能芻

綦蔬糲文錦布縑輪奐蓬茅器無飭銀服無裁綺家  
居檢書課農灌漑花竹年踰八十則日焚香靜坐精  
神內瑩聰明長存出入不杖卒之日顏面猶生也雖  
天畀之以遐齡康祉然而祿位未極議者每有蒼生  
之憾云

李 鏞

李鏞字時器湯陰人天資穎敏氣宇端凝成化壬辰  
進士授都水主事管河臨清改作板閘又緝內使私  
鹽數萬引沒官復除刑部遷員外郎郎中奉命賑山  
西饑民多活流民有爲盜者鏞入其巢諭還本業開

渠灌田萬頃民刻石頌德擢鴻臚寺少卿諫罷鄧常  
恩廕職及毀西山戒壇弘治初數上言便宜再擬巡  
撫會有沮之者遷南京太僕少卿再遷光祿卿削冗  
濫之俸抗章數工部器具窳薄耗財無益遷工部侍  
郎虜入榆林命兼憲職治餉虜遁還朝言十事且謂  
外攘宜先治內今盛齊醮嗜燕游寵他技以雜金紫  
畜異禽以糜梁肉此好漸長恐遠人偵伺以順逆邊  
方觀視以勤惰命山東漕上言塌城之壩毋毀沈河  
之塞毋通浚泉疏水漕利可復邊城奏密雲將有虜  
宜備之 上曰非鏃往不可召至榻前諭旨鏃始至

簡將廣儲已乃治壁壘飭器械守險隘梁溝澗墾荒  
田疏河流悉有成績 上謂司馬劉大夏曰錢果善  
幹國者正德初遷尚書劉瑾用事惡先朝大臣不附  
已遂致仕瑾誅詔起還部加太子少傅四辭乃允是  
後倭幸益雜修建大增鼇山之戲內苑之供造軍器  
繪綺豹房僧寺鎮國延壽凝翠太素知殫刻畫色累  
金碧文石采瓦窮麗極奢隱憂顯諫未嘗遽已也  
內宮災新作之鏤雅有心計量物平價擇舊成新費  
省而工堅諫疏歲數十上其曰漢文之賢罷露臺而  
著隋帝之敗開汴河而致蓋民所有惟財與力力竭



則懟財散則叛今亡徵已顯可又促之屢請停他營  
併成內宮 上或奪俸示譴或間從一二太監劉養  
監各工鑿與議不協而叱之養素寵貴泣懇于 上  
前直鑿不究嘉靖改元年七十有五曰吾在先朝義  
不可去今 聖主興遺賢進吾納祿讓能此其時乎  
歸來八年春秋祀墓外靜坐觀書不出戶庭不燕飲  
無音樂蓋天性節約至老不渝云卒年八十二謚恭  
敏

賈 鉞

賈鉞字良金別號東林安陽人幼有奇質刻志苦學

弱冠補郡庠弟子員成化丁酉領鄉薦戊戌聯舉進士授知山西汶水縣汶水民健訟至則務以德化遠近帖服甫三載以賢能被劾薦召授監察御史行囊蕭然民有包老之稱老稚遮道悲號不忍捨去居臺未幾卽巡中路風裁粟粟盜賊逆息丁外艱奔歸哀毀踰禮服闋按遼東有都指揮李姓者久橫不法首劾之武弁震懾而邊地蕭然再按兩浙值溫處礦賊陳廣等搆亂勢焰甚烈不避危險提兵勦平之捷報上有彩幣之賚弘治壬子擢福建按察僉事時建寧礦賊猶溫處奉勅兵備其地一方以寧遂擢憲

副歷山東憲長左右布政使憲度嚴明德意誕敷在  
在有聲而清操益至正德壬申晉巡撫陝西等處地  
方兼贊理軍務丁內艱聞訃卽日歸時逆瑾恣橫織  
羅百司以直慙不阿坐事罰米千斛輸邊傾家償之  
畢事懼他禍遂乞休情極迫切再疏乃俞瑾敗銓部  
累起辭不赴世宗初詔晉秩二品階資善大夫逾  
年卒享年七十有六性資沉靜器度宏雅嘗以矜莊  
自持自外觀之貌若遲鈍及其臨事毅然有爲雖甚  
難處者無不曲中厥歷中外餘三十年始終一節不  
少渝其居林下十有六年自處一室無媵妾暇則課

子讀書惇行孝弟絕口不及時事物論高之

崔 銑

崔銑字子鍾更字仲鳧安陽人父陞仕至叅政廉靖  
有聞母李淑人之娠也芝產門闌及誕夢蛟龍驚寤  
而生啼聲洪亮風骨岐嶷見者異之五歲口占成誦  
稍長博極羣書講太極圖通周易弘治戊午年舉於  
鄉庚申入太學祭酒謝鐸歷試稱首大奇之壬戌會  
試又不利乃與三原秦憐馬理諸公相友約明經修  
行母慕高虛母溺訓誥母耽詞章母蹈利名其志毅  
然以洙泗爲師乙丑舉進士改翰林庶吉士正德丁

卯授編修預校實錄戊辰會試爲同考宰執欲私其子以託銑銑不可竟出他手時關瑾竊政囚戊元老奴僕端揆銑與修撰何塘見瑾長揖而已瑾怒謂其黨吏部尚書張綵曰翰林白面後生輕薄如崔銑尤甚欲重罪之綵不可塘謂曰吾兩人不可易節對曰銑安義命久矣是歲實錄成瑾僞傳上旨史臣未練政體各陞俸一級調部屬州縣銑改南京吏部驗封司主事部歲儲縱糧長易羨惡銑廉出之糧長賂請權貴固執不可尚書謂曰爾謫僊也何苦爲此對曰何勤非忠孰忠非分竟格姦庚午瑾誅召還史

館辛未會試再爲同考時輔臣治文藝銑上書勸以  
及時悟 主救民薦賢理財強兵母事瑣末懇懇千  
餘言癸丑冊封周藩歸郤厚餽還京掌 廷試卷充  
經筵展書會御史王廷相下獄瀕死亟請執政曲拯  
出之丙子充經筵講說官啓 上以擇相輔德納誨  
去讒頑戒逸豫時權倖錢寧錢安廖鵬在側大銜之  
各歷三考晉侍讀丁丑春罷經筵引疾求去少傅梁  
儲素重銑固留之乃三爲會試同考事竣得歸稱觴  
二親時父母年皆八袞餘矣巳卯作後渠書屋董耕  
授徒刪定二程遺書作郡書 世廟卽位輔臣諫官

交薦起修 武廟實錄以備經筵癸未講論語開陳  
治本啓沃懇切尋擢南京國子監祭酒銑開誠心崇  
正議明教條嚴祀事獎雋彥警輕惰諸生朝夕問難  
銑嚮答不倦周貧佚老問疾賻喪士林大說逸尹梅  
繩南謫時友也抗瑾奪官貧且卒矣其母自鬻書屋  
銑分祿以養爲治棺歛甲申議大禮銑抗疏勸 上  
勤聖學辯忠邪以回天變自分必被逮已而報休銑  
曰 天恩蕩覆見老父幸矣諸生愕然如失怙恃銑  
歸囊無江南一物惟携古書數篋因自笑曰人言金  
祭酒我今若水矣公卿及諸生送者千餘人從而渡

江者又數人銑乘醉登舟歌曰故園菽水知堪養捷  
徑南山保未曾歸見父愉愉如也日讀書洎上折衷  
羣言四方來學者衆或持厚幣來學悉却之每教以  
研經飭行曰道在五倫學在治心功在慎獨丙戌罹  
父艱哀更甚於母時著松窻寤言中庸凡演大學全  
文又著士翼政議中說考文苑春秋家居十六年初  
號後渠繼又號洄野己丑立皇太子上慎選宮  
寮起銑詹事府少詹事兼翰林院侍讀學士少師夏  
言政暇過談夜午忘歸贈句有一字不曾通政府十  
年始得見先生尋進南京禮部右侍郎庚子署戶部



篆清耗厘弊進賀 萬壽聖節部例公臚悉拒不受  
時有風霾之變銑自劾 溫旨慰留冬過家疾作杜  
客調攝著讀易餘言辛丑病不克南行議乞休未果  
病劇卒年六十四銑博學善談從遊者多所感發門  
人如吏部郎中王與齡輩皆日依之不能舍去計聞  
上遣官治塋諭祭贈禮部尚書謚文敏所著書多  
行於世天下學者惟稱曰後渠先生

張士隆

張士隆字仲修安陽人弘治乙卯舉于鄉卒業太學  
春試不利三原馬理集友講學期以明經修行甘慕

高空母溺詁訓母躬辭母陷利與名其志以沫泗爲  
師士隆獨持議曰諸君日端默寂戢可謂能閑其心  
矣要須干事爲驗其實身與世爲二理與事相乖非  
聖人合內外之道也已而士隆還安陽乙丑舉進士  
授廣信府推官晉監察御史光祿卿李良素諂事少  
師洛陽劉公得美遷又以女字少師孫時少師以諫  
爲劉瑾所逐良詐言女死乃他適仲修上疏劾良良  
坐罷癸酉巡河東鹽法運使劉瑜貪而有與援士隆  
劾罷之豪右肅然歛手鹽法大行又以其暇建正學  
書院鑿青石槽開茅津皆爲大衢甲戌內宮災上疏

曰陛下前有逆瑾之橫後遭薊盜之亂既不知警  
方且興居無度曠近非人積戎醜于禁中戲于戈于  
臥內徹夜燕游親信內臣取貨于外又扣軍糧皆名  
進貢織造龍幄科害靡極鄙猥無聞使之巡撫納銀  
指揮授之政事盜伏而虜發民竭而兵罷守法御史  
如劉天和則就逮張璞則死詔獄間閭之苦禍機之  
蓄皆不知也今宜痛懲前弊更宜克慢絕滯早朝親  
政講官說經師保論道究精一之傳考興亡之故以  
表天下哀衣博帶之雅孰與市井狡穢之羣廣廈細  
旃之樂孰與邊徼凶危之隊不報巡按鳳陽織造中

官吏宣醕酒作威以大括財荷黃挺二日賜棍有拒  
令者杖殺自都御史以下都不敢禁士隆疏言之且  
列其賄若干還京守道事有張順者京大猾也隨中  
官守雲南歐門子死潛回京避之雲南巡撫移文逮  
之急乃出官以二隸押送至桃源重貨二隸竊取淮  
上病丐斃之二隸告順死勘實給文歸已三年矣士  
隆閱案疑之密廉之數月果得順坐殺二人罪時錢  
寧大有寵賜姓朱廖鵬附之初鵬以中官廖堂爲兄  
守河南鵬凶殘積金帛如山旣敗又以鸞爲兄鎮守  
陝西而其子鎧用事二廖名振京師傾財結納自師

保元臣相與接席酣飲士隆率其寮疏其罪且曰堂  
來鸞往兄甫罷而弟嗣任鵬內鎧外父制中而子擅  
利鵬毒河南已起內盜鎧毒陝西必召外虜朝廷豈  
無他才專用一家兩省亦有何罪日受百害耶鵬寧  
大恨罷職御史薛鳳鳴以殺人被逮又夜自殺二婢  
子置朝門外懷諜訴其寃鳳鳴素事逆瑾當案者卽  
遜去累年不決都御史幸庵彭公以獄付士隆及御  
史許完掠治取服鳳鳴知事急貨錢寧以其妻女往  
要之寧受鳳鳴愬爲上奏乃下士隆及完獄閱七

月士隆降判晉州完判定州已而士隆陞知州嘉靖

初復御史所司忌其才仍擬知府太宰石燕峰曰凡官居者悉以資深超用而謫者罷者猶以淺資拘常調是佞者常伸而忠常屈也何以勸後乃得漢中守備副使其地居終南太白間西南連蜀東接鄖豫山巖業羅立山中長廣數千里有良田美隩水泉沃灌宜牧多竹木可材文狸蔚豹可裘民淘濱河沙得金大抵逋逃者擅爲業歲貨軍官與通則吞併弱小藏大盜伺便出掠又好報讐殺人急則變作朝廷置都御史鎮之士隆至極貪用良賊有王大王二結回回爲患官不敢逋所在皆立親識急則投匿號曰賊主

士隆諭之曰汝能擒賊卽汝功吾賞若否則吾率軍  
焚山是二者禍福汝何居主見士隆備飭語直皆叩  
頭曰幸公活我居數日各獻賊士隆又取賊主怙惡  
者十家破滅之歲遂大安乃堰響水溉田千畝立隄  
防溢又修雲霧水未成而卒安陽崔銑痛惜之輯其  
行實志之甚備

馬卿

馬卿字敬臣林縣人也父圖沁州知州卿少而穎敏  
甫十齡圖示以經書大旨旣曉析已摘文清峻弘治  
初年十七舉鄉試兩試春官不利卒業大學時臨清

王佐以貢至卿察其博覽有行遂借張士階田汝籽  
輩講易於王氏十八年會試中式入對大廷策問道  
未行法未守卿答曰政事之柄握於司禮刑法之權  
移於厥術蓋切中時弊云大學士劉健覆閱卷竒之  
改庶吉士正德二年授戶科給事中六年同考會試  
未揭曉禮部移文內簾主考學士靳貴奴洩試題於  
常州舉人某某受千金主考劉忠驗號一人中式比  
填榜黜之曰用戒黷貨者已出院卿疏請究之竟坐  
奴罪一舉子充吏貴大愧恨吏部遂以卿爲大名府  
知府時蘇盜大亂大名戎馬充斥又值凶歲卿至郡



修城浚池礪器募兵以令陳智教諭陳惻爲總領親閱能否大彰賞罰人思奮力東明小邑賊攻圍十有二日不拔遂去相戒勿入郡中卿復請留運米若干斛採荒得報自散之無餘侍郎王某掌賑濟怒卿之專入境見道樹不伐民安不流乃更稱其才初遼東甯杲自御史陞僉都御史已除名潛居京師厚賂閣永求復官擒賊永諷諫官薦之卿適在工科同官有及之者卿奮袂而言曰世果無人寧用鴛如卿者可也畿內可復令渠壞之耶已而傳旨復杲僉都御史巡撫真定并討羣盜杲必欲中卿以危法至大名摘

疵索癡威脅語侵卿不爲動亦無從得聞乃令供軍需二千金卿謂必得印信公移乃敢發卒如請十年進浙江按察副使溫處兵備孝豐湯氏作亂莫克平者卿至上議曰湯氏自知罪大不赦無一日而忘死則爲備必深凡孝豐在官者皆與通我有作彼必知之今糧差不及孝豐湯之故也豪右名曰讐之實欲存之以便已况法弛綱頽民畏湯如虎而眇官如羊夫千里襲人情必先露山路險狹如鼠鬪穴林木蔽翳可以設伏彼安居以待我竭力以攻或遭連雨勢難持久皆我之所忌也然度彼之勢敗形亦多負險

固守聚而不散則可圖拒命假息多疑少決則可劫  
素雖桀驁未見大敵則可威收召豪傑引結讐家明  
示利害公出刑賞則可用榜諭謀說降赦誅我威  
既振彼思自脫則可離皆彼之所忌也夫用兵者不  
以短擊長而以長擊短則兵未接而勝已定矣時不  
能用及改山西提學轉叅政時晉國發喪妖民張鉞  
欲乘虛取會城張旂舉號卿先知之有備鉞不得發  
御史不然後行部爲鉞黨所攻幾不免乃大索賊忿  
將多戮卿又從容開釋無辜者甚衆嘉靖二年進浙  
江右布政使中官張志聰吳勛造幣于杭自擅權利

又縱行頭色料既不中程而挾金以逋十年不訖工  
卿蒞之乃與御史歐珠協心裁抑檄杭守查仲道以  
平價易色料於商他無與也中官奏卿及仲道抗違  
新命凌忽使臣有詔逮卿及仲道詔獄治卿及仲道  
各引爲已罪珠疏救卿謫鶴慶知府珠仲道亦坐降  
調卿歸省親會友飲燕甚洽久之適當別笑語之曰  
丈夫志在萬里如雲南直履堂奧耳至滇見鎮守中  
官不答禮卿立而言曰吾不過再繫而已矣中官改  
容謝過鶴慶民樸而士少文卿推誠布化抹撥煩苛  
均徭平賦通道水利漾江西至登和地亢而藉潤桔

棹抄濟詢之士人云惟麗江可疏而灌之然異境民私之而壅其流卿乃移文麗江委官作漾江堰高丈許濶如之沿江鑿渠深濶幾丈旬日而就暇則教誨生徒講授大學中庸又諭之以文曰古之學者首之六藝近事也繼之六行崇本也至六德考厥成矣今習課試之文科第爲志官祿爲功及幸一第筌蹄盡廢名曰舉業之弊綴砌爲文借偶爲詩拾古人之餘敝一生之力不足以覆瓿名曰詩文之弊晚宋陋儒浚伏羲之畫轉濂溪之圈不反身心但求毫楮今又齊其糟粕以自迷名曰理學之弊宋之四子翊道之

功大矣造詣深矣乃有入室操戈之徒訾張詆邵右陸左朱肆怪僻自高而忘其履之卑此過門不入吾不憾焉者也有已則不學專以非人凡人之善曲爲巧詆諸生能如古人之學聖賢何患而不至舉業資也詩文藝也性理本也天下之善吾師也又令行鄉約郡人化之土官鳳朝文及安銓叛或指卿間道可逸也卿厲色曰丈夫不死國而死家者何麗江土官沐公朝文之女兄衆畏其兵悍視其順逆爲從違卿約會兵境上告之曰汝兵誠精然賴累朝恩命而然汝叛朝廷兵不能叛汝耶汝受厚恩而忘之兵受

汝恩與汝之受朝廷者厚不待較一旦反噬何難麗  
江人欲得汝之處者何限顧畏朝廷威鎮之且朝文  
不有其君與其兄何有於戚卽事成容能處汝下乎  
君乃北面而事之乎沐公感泣出兵二千往援會城  
滇人曰麗江兵故難調也由是二酋失助瓦解矣七  
年正月遷雲南叅政再遷按察使委勘平蠻功過當  
實當道器之御史劉臬薦卿宜亟召還貳六部贊國  
大猷巡撫大同蔡天祐薦卿自代謂卿氣量可以消  
反覆才畧可以理紛結不報明年轉福建右布政使  
尋進南京大僕寺卿丁外艱十六年服除起光祿寺

卿遂擢右副都御史總督漕運巡撫鳳陽地方卿至  
淮會漕塞議者紛紛謂復海運開濟汶卿謂六月無  
漕京師困矣姑紓目前之急乃疏黃河故道而固隄  
毋令走洩未幾漕利上錫白金綵段奏除淮揚軍餘  
無田子粒凡若干兩又請餘鹽并鈔關銀賑濟僅畢  
事而卒年五十有八

張衍瑞

張衍瑞字元承河南林縣人也舉弘治十八年進士  
明年爲正德改元授清豐知縣以勘事執法爲逆瑾  
所惡矯旨下詔獄楚毒備嘗瀕於死者數矣瑾誅赦



出歷陞吏部文選司郎中十四年 毅皇自榆林還  
復欲南狩時寧藩蓄逆上下以爲憂大臣科道交疏  
留不聽江彬輩又從吏詔以三月壬子駕出行瑞曰  
卽畏罪不言寧不爲宗廟朝廷慮乎乃抗疏率同官  
六七輩赴闕上之大畧言巡游費財動衆寓縣騷然  
而隱憂伏禍且不可測 上不允明日諸曹屬各上  
疏諫前後百有七人詞益亟切 上怒罰跽門五日  
而京師忽風霾晝晦禁內海子水溢高四尺許橋下  
七鐵柱折有金吾衛指揮張英者以是爲變之明驗  
乃內袒戟刃于育以 諫 上大驚詔諸言事者各

杖三十倡之者謫外衍瑞得平陽府同知 世宗卽  
位召復原秩尋擢太常寺少卿踰年卒於是言官疏  
衍瑞負性忠直兩遭困厄宜加褒恤以勵臣工詔可  
贈太僕寺卿仍賜祭葬廕子

王勲

王勲湯陰人少爲諸生納粟入太學銓授涑水知縣  
慈於撫字明於聽斷衆稱其才正德初宦官用事有  
歸塋其親者有旨令衆闈會塋所過州縣競事奢媚  
勲恐厲民止備牲醴數事逆瑾聞之忿怒欲立加顯  
禍時闈人有家於涑水者屢以勲清廉爲解瑾俾邏

校入縣署覘之室中蕭然惟衣帶掛壁婦子紡績爾  
瑾始信其廉獮以肉帛勲分給里甲一無所留詭言  
曰令衆感劉之惠也特優伶有進戲 御前者一鬼  
躍舞於途諸達官過之鬼恬不畏忽傳呼王勲來鬼  
亟趨避之問何故鬼曰官不要錢神鬼皆怕由是勲  
廉名徹於內廷矣特蒙旌獎且令吏部移文爲天下  
諸官式擢知汾州勲堅持廉操終始如一無何去官  
歸里躬耕食力不履城市幾三十年始卒

葛 覃

葛覃字延之磁州人正德甲戌舉進士令樂清三遷

官至南京戶部郎中守平陽乃憲陝西覃有治才理簿書詰囚獄精明立可辯吏不得爲奸在樂清堪與家言建署背吉地故令無遷官者宜改治延之不從減武官濫役民遭其構不動在平陽辟盧生又辯其屬之誣皆忤上官蓋其操廉無可指瑕故遇事守法執典天性簡言笑交遊每日兢兢律身恐越繩墨論者謂宜濟之以弘裕然循其習性無變也

郭樸

郭樸字質夫世稱東野先生安陽人也生而穎特甫就外傳卽開敏見竒文聲籍甚里中文敏崔公器異

之固安楊公以狀元督學中州鮮所許可至閱其文  
未嘗不擊節稱善也十四舉茂才二十一爲嘉靖辛  
卯舉於鄉乙未成進士肅皇讀其策亟稱善命傳  
一甲後蓋異數云尋讀書中秘授翰林院編修歷春  
坊庶子典試兩畿分校禮闈最稱得人晉禮部侍郎  
尋加太子賓客予二品服後以六載秩滿遷南京禮  
部尚書加太子少保辛酉命掌部事尋拜吏部尚書  
俱出特簡壬戌大計手詔樸慎評衆職以守令爲先  
奉行惟謹癸亥丁外艱 賜乘傳歸乙丑冢卿虛席  
時未終禫 肅皇念其持衡平特 旨召用 疏懇

辭弗獲其母以大義趣就道比入都門服既已闋矣  
乃易服拜命尋以二品秩滿加太子太保丙寅兼武  
英殿大學士入叅機務丁卯 肅皇升遐 穆皇嗣  
服念翼戴功加少保命 總裁 肅皇實錄同知  
經筵重錄 永樂大典成加少傅兼太子太傅一日  
忽念母春秋高迺稱疾疏乞骸骨 穆皇固不許諭  
留甚溫命醫視疾賚予特厚疏累上始得請 賜乘  
傳歸侍養樸蚤歷禁垣鬱負公輔之望一分校禮闈  
再典兩都試所錄士必學術經濟有裨實用毋取窳  
言以故得人爲盛兩典銓部絕請託奔競惟以大公

行之其稱進以賢不以譽其斥謫以不肖不以毀且  
度地遠近才細大要使人與事相稱而止否雖權勢  
所主不稍假借而大指迺在惜人才捐細過母以尅  
核繩下嘗謂人稱銓曹爲恩怨府夫亦已自爲恩怨  
耳恩怨出於已實難自人何害故在事日人莫測其  
喜愠之端亦卒無能以私喜愠有加也迨入內閣受  
命滋益恭與同事諸臣造膝陳謀叶心圖理未嘗有  
所勃礙一時相業無訾議焉歸且十年乙亥丁母憂  
壬午 神宗念 先朝耆舊月賜廩歲賜輿隸庚寅  
壽八袞遣行人將命 存問加賜月廩輿隸癸巳五

月十八日以疾卒蓋年八十有三矣爲人豐頤洪聲  
舉止端慎天性至孝初第時將二尊人京邸朝夕色  
養怡怡如也比居喪雖白首如孺子必盡哀撫諸弟  
篤摯仲先亡每念之必泣下視其子猶子也立宗法  
建祠堂以聯其族敦睦亡間性尤冲澹茹蔬衣素家  
居未嘗高大垣屋將令後世師吾儉治二親窶有司  
欲大其塋制亟止之請卹賜祭具成禮而已諸子若  
孫皆謙冲節約望之者不知其爲相君胤也當其以  
太宰宅憂學使者里選三子俱異等矣識其深意無  
一赴省試者比得謝歸角巾私第絕跡不至公府然



或兩臺蕃臬諸大夫而下式廬就訪政事所宜興釐  
輒媿媿力贊其便里人甚德之

李秦

李秦字仲西河南臨漳人生而穎異嘉靖十三年舉  
於鄉明年登進士改庶吉士授刑科給事中尋轉吏  
科左條陳時政六事 上嘉納之著爲令陞禮科都  
給事中時分宜任禮部尚書寵子蕃頗放縱納賂秦  
抗疏劾之分宜惶懼訴辯疏雖留中不報而秦聲望  
大著後竟遭中傷調倅大名分宜屢因考察欲罷秦  
奪於公論不果秦在郡聽斷明允屢白疑獄有濟民

屈際者素虐其妻妻逃去妻父告際歐死沉屍於河指際讐僕證其事際誣服獄成數歲秦閱案疑之密訪於五橋堡民家獲際妻際得開釋歲饑上官委秦施賑旬日徧歷十一邑給散有法全活甚衆郡守載之守魏錄永爲荒政式陞鳳陽府同知父喪去任服除陞戶部郎中尋丁母憂服除補武選郎中陞通政司右叅議遷左通政自嚴氏專政淹滯外內二十餘年後竟爲其黨所排歸來結廬洹上名曰知止時與朋舊吟咏灌蔬種芋此外無所事也卒年七十

王邦直

王邦直字國寧磁州人也生而駢脇有神力稱王千斤云弱冠補州學生業已食廩矣而非所好也乃學騎射窮韜畧有求試請纓頸繫單于之志日擐甲令左右奉弓刀侍自府谷歸遇虜于道發一矢不中中石石爲之泐虜取矢視如杠駭焉遂不敢近嘉靖二十一年邊警頗急詔舉才勇於是兵科都給事中戴夢桂薦邦直於朝命詣大同贊義總督侍郎翁萬達與語甚驩乃延入幕府以國士遇之解衣授食分坐談邊邦直亦願以肝膽相歸再踰年謀報虜將入寇萬達使邦直同叅將張鳳率義兵五百人出塞外覘

視抵鵠峪峪窺山上賊數十騎往來邦直感而擊之  
無子遺者復見山下賊百餘奔焉邦直與鳳謀可悉  
取殲之後者曰將軍功奇矣可勿逞竟飛騎以往踰  
谷口數里忽至大陸溝中伏兵約三萬餘騎列兩大  
翼而陣邦直激衆奮勇以矢石急擊而身自引弓射  
殺賊首賊憤合圍七重戰七日夜邦直斬虜千餘級  
會天雨雪矢食俱盡邦直潰圍而出檢義兵從者惟  
王國順一人耳邦直嘆曰吾與汝等本欲立功沙漠  
以報主恩不意衆寡不敵損亡殆盡且鳳旣亡而吾  
獨存耻也異日何顏面見軍門邪遂策馬復入賊營

力竭被害虜固壯邦直環其尸相視嚙指翌日遂引  
退我軍輿其尸而歸旣而有自虜中還者云諸部落  
皆悲泣謂是役死傷不勝紀自此虜數年不復敢犯  
初邦直之死也諸鎮士吏知與不知皆爲盡哀萬達  
親爲文祭之已乃上疏請錄恤又擬張世忠故事乞  
謚表爲立祠與張鳳並祀而以李尚倫等八人附焉  
詔從之贈邦直都指揮僉事建祠以祠仍廕子化熙  
爲潞安衛正千戶世襲

河南衛輝府

邢冕

邢冕新鄉人洪武初進士任江寧縣主簿勵操清苦  
妻張氏躬親杵爨 太祖微行至其廨舍見之翌日  
朝謁特召出班嘉賞歷陞戶部郎中重慶知府皆以  
賢稱歷官都御史

靳義

靳義字原禮淇縣人洪武中以鄉薦任北平道監察  
御史正色立朝風憲得體永樂初出按北京糾治貪  
墨讞決疑獄咸得其情吏民畏服日啖蔬食櫛毫髮

無取於下時 皇太子居守北京賜魚米以旌其廉  
且語左右曰靳義可謂真御史也陞湖廣按察副使  
以入覲卒於京

郭 欽

郭欽字子敬獲嘉縣人登永樂甲申進士授行人擢  
監察御史嚴毅清簡吏民憚服鑿呂梁洪以通運道  
後護軍北征皆以風力見稱於是權貴亦斂手畏避  
焉

馬 英

馬英衛輝人天性狷介有志操景泰中以鄉薦任淮

女府通判九載公廉卓有惠政淮人愛戴之擢本府同知蒞官始終一致聲績益著自懇乞休雅志恬澹動循禮度鄉人重之

周鳳

周鳳字文祥汲縣人禔躬狷介不屑脂韋天順中舉進士授兵部主事歷員外郎郎中陞大平知府廉儉之操終始如一麤衣糲食如寒素士九載滿去郡人老稚擁道泣送仕至福建都轉鹽運使

王嵩

王嵩字邦鎮汲縣人也成化十一年進士授太湖知



縣丁母憂服除再授青城以卓異拜監察御史嵩恥苛察崇忠厚務持大體初按遼左遼之將領弊端百出嵩悉爲裁正其開原鐵嶺諸衛前按遼者多不至其地嵩遍爲閱歷事事嚴明一時邊備清肅繼按江右會巨盜楊九龍者聚嘯山林吉安迤南俱爲騷動嵩處以方略不踰時而盜就擒事聞降璽書文綺旌之會歲侵民饑人多轉死嵩急令郡縣長吏發廩賑之所活甚衆擢大理寺丞進左右少卿指揮某母再以不孝告法凡再告者不復訊其犯稱寃不已嵩疑其母與人通而疾其子又據律有父母誣告之疑

遂駁之諸刑曹皆笑以爲再告無駁者及復訊其母於囚棚下產一女舉朝歎服內府匠申能格殺人法當抵命匠迺夤緣權貴得上旨與之辨理勘者欲希順上意嵩獨曰生殺予奪君上之權也奉公執法臣下之職也匠兇殺人甚慘若生者得以倖免死者何辜覆以爲不可上從之由是嵩名益著十一年擢右副都御史巡撫延綏時武備久廢鎮守暴貪嵩至頓革其弊而邊務始振後逆瑾擅政求賂於嵩嵩弗從遂誣嵩侵尅官銀矯詔下獄籍其家仍戍於鄴嵩雖爲瑾所誣而怡然自處不以夷險易節後四

年事白瑾棄市復嵩爵而所沒之產仍命有司給焉  
年八十四卒嵩生平篤於孝友兄三人事之甚恭所  
得祖產悉以讓之

李文泰

李文泰字時雍輝縣人成化丁酉科舉人任長清縣  
教諭造就人才卓有聲譽歷翰林院待詔陞榮府紀  
善加奉議大夫性至孝遇父母疾衣冠不解親嘗藥  
餌以進宗黨咸以孝稱

原潔

原潔胙城人少勵志讀書登成化辛丑進士歷官戶

部郎中居官清謹嘗督大同兵餉以羨餘還所司不悅者以藥瘖其音上疏乞歸結廬草店布衣蔬食澹泊自甘邑人至今稱之

劉璋

劉璋字廷圭汲縣人登成化丙辰進士授高密縣令廉明仁恕興利除奸增學舍勵生徒聲稱茂著擢福建道監察御史陞山東按察僉事歷官右副都御史勞績弘多風紀振肅比卒朝廷遣官諭祭并營葬事纂集山東通志以才名見重於時

陳曄

陳暉字文耀汲縣人成化間以鄉薦分教臨清精於  
易學諸士多執經受業弘治九年任池州通判清慎  
明敏監司優其處屯軍之宜奏調蘇州府以障水功  
陞廣平同知改真定任至陝西按察司僉事臨清池  
州兩祀于名宦子與音進士官御史歷叅政

陳玉

陳玉字德輝輝縣人舉弘治庚戌進士授靈璧知縣  
治績稱最擢淅江道監察御史累有建白爲時所重  
出按福建風紀大振值延寇嘯聚設機蕩平 孝宗  
嘉其功賜衣一襲正德初以事謫湖廣布政司照磨

旋擢令會稽陞四川按察僉事以母老求歸杜門謝  
客未嘗一至公府人高其行

馬龍

馬龍字道濟英子耿介有父風登弘治丙辰進士授  
臨汾尹有治行再補新城擢監察御史風裁凜然以  
名節自勵凡言行必取則於古人居親喪衰經不去  
身者三載其事兄尤盡禮人以孝友稱之

李光幹

李光幹新鄉人弘治己未進士任南京戶科給事中  
時逆瑾擅權抗疏力諫言甚切直瑾激上怒逮下

錦衣衛獄廷杖革秩。世宗卽位詔復原官尋陞台州府知府政暇輒進諸生躬課教之士類翕然化焉。所著有定疑諸書。

潘鐸

潘鐸新鄉人弘治己未進士任兵科給事中時雍泰巡撫宣大廉隅稜峻嘗縛叅將李傑撻之傑有內援奏泰擅打將官罷職鐸抗章力諍泰有敢死之節克亂之才爲逆瑾所忌尋以都給事中出知漢中府公議躋之歷官浙江右布政使

李可登

李可登字思善輝縣人翰林待詔文泰之子也幼懷  
慨有大志居恒以忠義自許孝親信友內外無間言  
已爲宗黨所推重矣弘治甲子領鄉薦正德十三年  
任大理寺司務轉兵部司務嘉靖三年會大禮議未  
決隨諸大臣後昌言之越明日伏闕候命衆大聲號  
慟徹於宮寢上震怒命執其疏首八人餘固伏不  
肯起命俱執下獄三日詔杖于廷各三十而可登竟  
斃於杖下見者莫不悼惜之穆宗馭極首褒直言  
諸臣詔贈可登光祿寺少卿

劉珏



劉珏汲人以貢士任刑部照磨正德中武廟將南  
巡珏連疏伏闕諫止上大怒令同諫者跪於午門  
五日因下獄廷杖卒車駕亦不果出世廟嗣位  
詔贈刑部主事命有司諭祭蔭其子鈺爲太學生以  
旌其忠令從祀鄉賢祠

### 蔡揚金

蔡揚金字子礪衛輝人舉嘉靖甲辰進士授溧陽知  
縣有惠政擢監察御史巡茶陝西嚴飭販禁增額外  
馬四百匹以足邊用巡按順天條奏荒政見之施行  
民賴全活者甚衆歷陞浙江左布政使以入覲卒於

京邸平生忠信謙謹小心周慎絕無矜傲輕倨之習  
鄉族以孝友稱子叔達進士官布政使叔達舉人

陰秉暘

陰秉暘字子寅衛輝人舉嘉靖丁未進士授餘干知  
縣有善政擢監察御史毅然風紀自任前後抗疏數  
十上朝紳憚之後爲忌者所排謫判同州稍遷館陶  
知縣平涼同知歷陞陝西僉事叅議所至皆有聲績  
還家堅志不起益肆力於問學居常佩服聖訓紀其  
言行以自考驗士類推服所著有四書贅說等編六  
卷四書自訓歌一卷陰氏讀書抄三卷內經類考十

本朝分省人物考

卷八十九

卷

四十一

集

河南懷慶府

郎敏

郎敏河南濟源人洪武七年以國子生選入武英堂紀事授監察御史九年以才能陞饒州府知府敏爲治廉明有惠愛樂平縣民有詣闕訴邑大姓五十餘家謀逆者詔指揮潘某率兵往捕之兵至饒敏驚曰樂平民素淳朴未必有此請先往察之至樂平民皆耕牧如常時敏廉得告者乃無賴子素以假貸不得怨諸大姓故重誣之冀獲賞耳敏還白潘初不之信自往察視故如敏言於是各以其家長至京辨其誣

詔釋諸大家誅矣告者其土人世世尸祝之

蓋霖

蓋霖孟縣人有奇才洪武中由太學生任禮部主事三十六年被旨掌部事規畫建置多所裨益歷戶工二部員外郎坐事謫興濟薦授交趾同知未抵任卒

劉幹

劉幹字孟貞修武人洪武癸酉鄉舉初仕長洲縣丞清修苦節公平仁恕民信愛之比卒邑人如失父母貧不能歸民爲買舟資送留衣冠葬于虎丘山側立石表其上曰劉公墩歲時致祭焉

王 黻

王黻河內人永樂癸卯鄉舉授嶧縣知縣蒞政廉勤  
練達治體秩滿嶧民詣闕乞留 上從之仍賜勅褒  
異後致仕歸民遮道挽留不忍釋

王 懋

王懋字希昭修武人永樂甲辰進士授海豐知縣嘗  
入覲以治行卓異詔賜錦衣一襲楮幣五百緡仍宴  
禮部以褒顯之累遷西安知府

何 瑋

何瑋字粹夫其先楊州如臯人國初隸河南懷慶衛

籍性穎異弱冠時卽已博通六經諸史討探有得於  
天人理欲邪正是非之辨卓有定見必欲措之踐履  
名重一時弘治辛酉解元壬戌進士選翰林庶吉士  
甲子授編修不納泛濫之交不入勢要之門讀書窮  
理衣布食蔬縉紳重之乙丑 孝廟升遐與修 孝  
宗實錄陞修撰時逆瑾專政瑋無異容自知不免遂  
乞休歸里瑾敗始復職辛未四方流賊起瑋上言祛  
賊三事時論韙之癸酉瑋於經筵直言納諫數日有  
旨外補同知開州爲三審法以平徭役爲分程法以  
築河堤民親戴之乙亥陞東昌府同知尋兩疏求歸

既得命乃隱居於南村四方從學者衆瑋以大學條  
領立爲訓格究解經旨常曰從此研究涵養則進取  
自裕 世宗嗣位起瑋爲山西提學副使以父憂不  
赴癸未改浙江提學副使浙人文華靡瑋務敦質行  
士風丕變甲申陞南京太常寺少卿署翰林院事比  
郭學士來代有羨餘白金十斤應瑋得者瑋執義不  
取郭以修公署勒石誌之丁亥夏陞本寺正卿秋陞  
南京工部右侍郎署印奏革 神帛暨九庫多餘機  
戶夫役絲料工作省銀數千是年改工部右侍郎隨  
改戶部以官民財用虛空之由立論六篇未幾改禮



部右侍郎偶疾兩具疏乞歸方允御史毛鳳紹疏  
敦朴正大允宜邦禮改命在京調理再乞休致尋陞  
南京右都御史力辭有旨致仕居家讀書不間寒暑  
與關中呂涇野靈寶許司徒儀封王浚川諸人簡札  
往來究辯經書性命之學戊戌母卒瑋先有足疾至  
是袒跣<sub>乞傷</sub>至廢坐立晦日不起壽七十歲瑋資稟  
高明孝友端潔早歲讀書勵志躬行剛直不阿爲文  
浩瀚宏暢醫卜術數皆潛心通曉所著有陰陽律呂  
管見大要以繫辭動靜有常虞廷依永和聲爲正有  
儒學管見醫學管見等書行于世

劉涇

劉涇別號次山懷慶衛人少承父訓長游柏齋何公之門講性命之學舉進士入史館讀中秘書者三年學益進既授貴州道監察御史初奉命清戎順天故事謫戍者類編發遠方歲煩清勾類多逋逃無補軍政涇職清戎時胡虜寇掠士伍空虛計以寇方在近且徵兵於遠而畿輔之民顧使之謫戍遠方非所以實畿輔壯根本也乃疏請發戍遼薊邊益新軍而民免遠行疏入報可迄今著爲令時上役未休工部以順天所屬積欠料價數多請兼委清戎俾嚴督輸辦

復奏以民新被虜方急撫摩顧以數十年之逋而責  
之一旦人將不安執政避之事遂寢其臨事敢言有  
補國是者多類此後按滇南適沭國襲爵之後權奸  
構煽人心皇皇沭氏幾搖至則鎮以安靜廣綏懷釋  
疑貳約束一新故事遠方選用頗輕官不得人易以  
階亂涇奏請視內地參用進士又念遠方文教未揚  
民不知禮請增廣解額以作士心人咸悅服復命諸  
所舉劾小大悉協輿論已擢知鳳翔府涇念地震之  
後民多蕩析乃加意拊循事稍煩民者悉爲破除暇  
則進士子課教之以父憂去民奔擁扶送者百里不

絕服闋補任登州如鳳翔先時遼東饑賑濟爲難建  
議者請寬海禁聽民市糴于登萊後遂聚衆商販勢  
不可止至有挺刃相戕者涇憂之上書政府恐以一  
時之權而啓異日之患市糴遂止三年晉山西按察  
副使整飭潞安兵備分巡冀南嘗與防秋駐師雲中  
八角堡時虜入犯嚴兵固守身爲長城屹不可動虜  
遂逡巡退去言者誤以前保沐國事疵之涇殊不辨  
遂落職歸涇少學於柏齋何先生已知自立旣由史  
館授御史所建白率據經引理可垂久遠出補郡守  
撫民必賑其急計事必防其微旣晉臬司籌邊事尤

能身捍虜衝卒被浮論略無怨尤惟建家塾教子弟  
與朋舊吟咏自適已耳

本朝分省人